

Korinita

Lenji Leta Theghewoniye

Pol Le Rorori

Utu iviva

Pol le vaghiliya theghetoniye e tine vambe i yaku Epesas tine, iyava i roriya Korinita lenji leta iviva, kaiwae vuyowo na mevathari vavana va ina ekelesiyako e tine. Ko iyemaenge othembe vama i roriya letako iyako na i variye wenji, mevathariko iyako vambe ina wenji. Iya kaiwae ghayamoyamo ngoreiye Pol va mbowo i wa wenji na ve yaku mbanja ubotu amba i njoghava Epesas. E le wako iyako e tine weiyangiya gharighari thi vegaihi wanangi na i vakatha ghamighamina vuyowo e ghanjilughawoghawo (wako iyako utuniye iya injake, “mbanjaniye va ya ghaona” 2 Korinita 2:1 e tine na tembe i govambwarava 13:2 e tine.) Mbanja i njogha Epesas na e ghereiye, amba i roriya Korinita lenji leta regha na i giya utu vurigheghe vavana wenji na i vathanavunji. Letako iyako ma ina weinda, ko iyemaenge utuniye Pol i govambwara 2 Korinita 2:3,4,9 na 7:8-12 e tinenji. Letako iyako Taitus va i li.

Mbanja Pol i roiteta Epesas na i wa Masedoniya ele valivanga, amba ve vaidiya Taitus gheke i njoghama Korinita (2 Korinita 2:12-13 na 7:5-6). Taitus i giya Pol yanawae ralonwelonweghathi lemoyo Korinita e tine thi warari Pol kaiwae, ko iyemaenge vavana mbe

inanjiwe thi vakavakatha thanavu raraithari. Tembe ngoreiyeva, ravavaghare kwanikwan vavana mbe inanjiwe. Thiye thi yangiwana Pol le kaiwo na thiŋava Pol iye ma ghalinae gharaghambi ngoreiye, mbe thiye enge. Iya kaiwae Pol i roriya letake iyake, i giya weya Taitus na tembe i njoghava Korinita na ve ligiya wenji.

E letake iyake tine Pol tembe ghamberegha i utuŋa yawaliye na le kaiwo utuniye (2 Korinita 2:12-6:13). Amalaghiniye le gharethovu Korinita kaiwanji na le warari thiye lenji gharethovuwe i govambwara. Ravavaghare kwanikwan na lenji yonji tembe i thombeva (Vangothiye 10-12). Pol i govambwara wenji amalaghiniye tembe nuwaiyava i wa wenji na ve thuwengi, ko iyemaenge nuwaiya mevathariko iya e tinenji wo thi vanamwe ko amba muyai ve vutha gheko (ngoreiya 12:20,21; 13:1-3). Tembe i utuŋava wenji na thi vivatharaweya mwaewo ralonwelonweghathi inanji Judiya e tine, thiye mbinyembinyengu kaiwanji na mbala amalaghiniye i bigi na ve giya wenji (Vangothiye 8 na 9).

¹ Ghino Pol, Loi le renuwana e tine ya tabo Jisas ghalinae gharaghambi. Weingu ghaghanda Timoti wo roriya letake iyake na wo variye i ghaona e ghemi, ghemi ekelesiya Korinita wenga, weimiyangiya ralonwelonweghathi inanji Akaiya ele valivanja tine.

² Wo nanjo weya Loi Ramanda na ghanda Giya Jisas Kraiis gharenji wenja na lenji gharemalili i riyevanjara gharemina.

Pol i vata ago weya Loi le thalavu kaiwae

³ Ra tarawe weya Loi na ghanda Giya Jisas Kraiis Ramae. Iye Ramanda raghareviri, na iye ragogonja nuwanda e bigibigike wolaghiye tine.

⁴ Iye mbanjake wolaghiye i gonja nuwame mbanja wo vaidiya vuyowo, na mbala ghime valikaiwame, thavala tomethi e ghanjivuyowo, thalavuko iya i giyako weime tembe wo gonjava nuwanjiwe.

⁵ Wo vaidiya vuyowoke, kaiwae wo lonweghathi Kraiis, na mbanja vuyowoke i tabo na laghiye, Loi i gonja nuwame, na le thalavuko weime i tabo na laghiye.

⁶ Mbanja ghime wo vaidiya vuyowo, iyako ghemi ghamithalavu na ghamivamoru kaiwae. Na mbanja Loi i thalavuime na i gonja nuwame, iyako ghamithalavu kaiwae iya i vakatha na valikaiwami hu ghatanaghati vuyowoke iya ghime wo vaidike.

⁷ Lama gharematuwo kaiwami i ndeghati vurigheghe kaiwae wo ghareghare mbanja hu vaidiya virike iyava ghime wo vaidike, ko ambane hu wo thalavuko iyava ghime wo woko.

⁸ Lama bodaboda, nuwameke nuwaiya hu ghareghare vuyowoko wo vaidi valivanja Eisiya e tine. Va wo vaidiya vuyowo laghiye moli na i rovarivarime na lama vurigheghe mava valikaiwae, na wo renuwana mbema emunjoru ne wo mare.

⁹ Emunjoru e gharemeke lama renuwaŋa va woŋa emunjoru ne wo mare. Ko iyemaenŋe vakathako iyako va i yomara weime na i vakathaima thava wo vareminjeime ghamamberegha, ko mbe Loi engevara, iye i vaŋguthuweirunŋiya ramaremare, ghamberegha ra vareminje.

¹⁰ Vuyowoko iyava wo vaidinŋiko valikaiwae moli wo mareŋa, ko iyemaenŋe amalaghiniye va i vamoruimewe, na tembe ngoreiyeva mbaŋako iya e ghamwameko tembe ne i vamoruimeweva. Iye ghamberegha wo vareminje, iye ne i vamoruimeva.

¹¹ Na ghemi e lemi naŋgona ne hu thalavuime. Mbaŋa lemoyo thi naŋgo weya Loi ghime kaiwame, amba lemoyo ne thi vata ago weya Loi mbaŋa iye weiye le thovuye i vamoruimeva.

Pol le renuwaŋa le wa Korinita kaiwae

¹² Lama ghamba sirari iyake: e gharemeke tine maya moli wo ghareghare ghamathanavu weŋgiya gharighari i rumwaru na i emunjoru Loi e marae. Ma wo goru weya thimba i mena e yambaneke, ko iyemaenŋe lama vurigheghe i mena Loi le thovuye e tine. Ghamathanavu ngoreiyevarako weŋgiya gharigharike wolaghiye e yambaneke, na ghamathanavu weŋga ngoreiye molivara iyako.

¹³⁻¹⁴ Lemi letana e tinenji, utuutuko iya hu vaona na hu ghareghare ghanjirumwaru iya wo roriŋgiya na e ghemi. Ma gharumwaru reghava ina weŋgi. Lo gharematuwo iyake: Hu ghareghare wo wagiyaawe mbala hu ghareghare

lemi ghamba sirari ghime ngoreiye lama ghamba sirariya ghemi mbanja ne Giya Jisas i njoghama.

¹⁵ Kaiwae emunjoru ya munje ghino lemi ghamba sirari, ya vakatha lo renuwanja na yanja iviva wone wo ghaona e ghemi, na iyako kaiwae mbala mbanjaiwo vara hu vaidiya thalavu.

¹⁶ Lo renuwanja va nuwanjuiya wo lavutha e ghemi mbanja ne wo wa Masedoniya na tembe ngoreiyeva ne wo njoghama, mbala hu lagiya thalavu e ghime lama ghinagha Judiya kaiwae.

¹⁷ Ngoronga? Hu renuwanja mbema ya utu bwagabwagaenge na ya mwanavimwanavi lo renuwanja ngoreiya yambaneke gharighariniye ghanjithanavu, na e ghaenguke njimwa ya varae yanja, “Mbwana,” na e gharenguke ya botewo yanja, “Nandere.”? Ma ngoreiye!

¹⁸ Loi iye rautuutu emunjoru mbanjake wolaghiye, na tembe ngoreiyeva lama utuutu e ghemi i emunjoru, na ma e ghaemeke njimwa wonja, “Ngoreiye,” na e lama renuwanja tine wonja, “Nandere.”

¹⁹ Kaiwae Loi Nariye Jisas Krais, iyava weinguyangiya Sailas na Timoti wo vavagharena e ghemi, iye ma “Ngoreiye,” na mbanjara vara weiyee “Nandere.” Ko iyemaenge amalaghiniye valikaiwae ra vareminje, iye mbe “Ngoreiye” enge.

²⁰ Ra ghareghare emunjoru Loi le dagerawe wolaghiye i vamboromboro weya Krais. Krais e tine thiye “Ngoreiye.” Na Krais e tine ranja “Mbwana Ngoreiye!” na ra tarawe weya Loi.

²¹ Loi ghamberegha i vavurigheghenda

ghemi na ghime na ra ndeghathi vurigheghe weya Krais. Amalaghiniye va i tuthinda,

²² na tembe ngoreiyeva i giya Nyao Boboma weinda i yaku e gharendake, iyake le nono ghinda le gharighari. Kaiwae Nyao Bobomako iyako kaerova ra wo, ra ghareghare bigibigike wolaghiye iya Loi va i dageraweko kaiwanda nevole tembe vara wova.

²³ Loi e marae ya dage emunjoru e ghemi lo righe na ma ya ghaona e ghemi Korinita e tine iyake: ma nuwanguiya tembe ya vakathava ghamivuyowo mbanja ne ya ghaona na ya goviya ghamwami.

²⁴ Ma ngoreiye nuwameiya wo mbaronanga na ghamithanavu ngoreiye wo dage wenga. Iye-maenge weimanjiya ghemi ra kaiwo na regha lemi warari kaiwae, kaiwae wo ghareghare e lemi lonweghathina hu ndeghathi vurigheghe.

2

¹ Iyake kaiwae ma ya ghaona na ya vakatha ghareviri ngoreiya va lo ghaona e ghemi.

² Kaiwae thongo ya ghaona na ya vakatha ghareviri e ghemi, ko thelaenge mbene inawe na ne i vawararinango? Nandere moli, kaiwae kaero ya vakatha ghareviri e ghemi.

³ Iyako kaiwae iyava ya roriya lemi letana. Va ya rori ngoreiye va ya rori kaiwae mava nuwanguiya ya ghaona e ghemi na ghino ya vaidiya ghareviri e ghemi, kaiwae mbala ghemienge hu vawararinango. Ya varem-injenga na hu ghambugha lo renuwanja na ne ya warari na tembe ghemi hu warariva.

⁴ Mbanja ya roriya letako iyako ya rerenuwana laghiye weingu lo ghareviri laghiye moli, na ya rori weiyе maralumungu. Ya rori ma ngoreiya ya thivathara nuwami, ko iyemaenge mbala hu ghareghare ya gharethovunga laghiye moli.

Pol i numotena thela va i vakatha vathariwe

⁵ Loloko iyako e tinemina va i vakavakatha ghareviri, ma yana i vakatha e ghino enge gharengu i viri, ko iyemaenge taulaghina ghemi enge gharemi va i viri. Ma nuwanguiya yana taulaghina ghemi moli, ko mambe vavana enge.

⁶ E lemi wabwina ghemina laghiye hu thithighiyawana loloko iyako, na iyako le vakatha modae maiyavarako.

⁷ E mbanjake iyake valikaiwae hu numoyathu le tharina na hu valogha nuwae, na thava nuwathari laghiye i ghenevarivari ne iwaenge i dobu moli.

⁸ Iya kaiwae ya nango e ghemi na hu vav-aghareva emunjoru hu gharethovuwe.

⁹ Tembe va ya roriva letako iyako na ya variye e ghemi kaiwae nuwanguiya ya mandonga thare ne valikaiwami hu ghambuvao lo renuwana wolaghiye.

¹⁰ Mbanja ghemi hu numoyathu loloko iyako, ghino tembe ya numoyathu weva. Ko bwana budakai va ya numoyathu, thongo bigi regha, kaero ya vakatha Krai e marae ghemi lemi thovuye kaiwae.

¹¹ Ya vakatha ngoreiyako mbala thava ra giya Seitan ghambanja regha na i kivwalainda. Kai-

wae gathanavu na le renuwanako wolaghiye kaero ra gharegharevao.

Pol le yaku Treos e tine mbanja ubotu

¹² Mbanja va ya mena Treos e tine na ya vavagharena Krai Totoniyе Thovuye, ya vaidiya Giya i vugha kamwathi kaiwanju.

¹³ Ko iyemaenge ma ya gharemalili kaiwae lo renuwanja va yanjanje ne ya vaidiya ghaghanda Taitus gheko, ko iyemaenge mava ya vaidi. Iya kaiwae ya mwaewo wenjiya Treos une ko amba ya warerinja Masedoniya ele valivanja.

¹⁴ Ko iyemaenge ra tarawe Loi! Kaiwae amalaghiniye mbanjake wolaghiye i viva weinda na weya Krai i kivwala. Loi i vakaiwonjainda na ra yathu Krai ghaghareghare utuniye e valivanjake wolaghiye, ngoreiya bigi butiye thovuye ndewendewe i uvewo e valivanjake wolaghiye.

¹⁵ Kaiwae ghinda ngoranda bigi butiye thovuye Krai i giya weya Loi, na butiyeko iyako i lalo i wa wenjiya gharighari thi longalongana vamoru kaiwae na thiye thi longalongana mukuwo kaiwae.

¹⁶ Wenjiya thavala thi longalongana thari kaiwae, butiyeko ngoreiya mare butiye iya i vanju na i wa e mareko; na wenjiya thavala thi longalongana vamoru kaiwae, butiyeko ngoreiya bigi butiye thovuye iya i vanju na i wa e yawaliko. Thela valikaiwae i vakatha kaiwoke iyake? Ma lolo regha!

¹⁷ Kaiwae ghime ma ngoramengiya gharighari lemoyo, thi vavaghareña Loi utuniye na mbala thi vaidiya vwenyevwenyewe. Ko iyemaenge ghime ma wo kwanikwan. Loi iye i variyeime na Kraisi ele mbaro tine wo utuna emunjoru Loi e marae.

3

¹ Mbwata hu rerenuwana lama utuutuko iyako ghanjilonwaloŋwa na ghaminani ngoreiya tembe ghamamberegha wo wovorevorenjaimewa. Nandere moli! Mane wo vatomwe wenga ghamawovathovuthovuye ghaleta iya gharighari thi roriya kaiwame na mbala hu vanguvathaime. Na mane wo nango wenga na ghemi hu roriya ghamawovathovuthovuye ghaleta iya wo vatomwe wengiya mbe ekelesiya reghava. Gharighari vavana thi vakatha ngoreiye, ko iyemaenge ghime nandere.

² Ghemi ghamimberegha ngoramiya ghime ghamaleta, iyava ina ghareme, na valikaiwae gharighari thi vaona na thi ghareghare.

³ Ghemi ghamimberegha ngoramiya leta i menawe Kraisi lama kaiwo e tinemi kaiwae. Letake iyake mava i rori e pen, ko iyemaenge Loi e Yawayawaliye e Une. Mava i rori vari e vwatae, ko iyemaenge i rori vara gharighari e gharenji.

⁴ Valikaiwae weiye lama gharematuwo wo utuna bigibigiko thiyako kaiwae weya Kraisi wo varemija Loi.

⁵ Ghime ghamamberegha ma valikaiwame na mbala wonja ghime valikaiwame wo vakatha kaiwoke iyake. Loi ghambereghaenġe i vakathaime na valikaiwame wo vakatha.

⁶ Amalaghiniye i vakatha na valikaiwame wo kaiwo dagerawe togha kaiwae. Dageraweko togha iyako ma i mena e Mbaroko iyava thi roriko e tine, ko iyemaenġe i mena Nyao Boboma le vurigheghe e tine. Mbaro va thi rori i womena mare, ko iyemaenġe Nyao Boboma i womena yawali.

Dagerawe Togha

⁷ Mbaro ghararorori va i rori e vari gethiwo e vwatanji. Na mbanja i giya e mbanako iyako Loi manjalawae marambwelambwelawae i yomara amba i vakatha Mosese ghamwae i ndalandala na ma valikaiwae Isirel thi thuweya ghamwae, ko iyemaenġe ndalandalako iyako tevambe iko. Loi le vwenyevwenye va i yomara mbanja i wogiya Mbaroko othembe i womena mareko.

⁸ Ko iyemaenġe Nyao Boboma le kaiwo i yomara weiyee le vwenyevwenye laghiye moli.

⁹ Mbaro mbe e ghavwenyevwenye, othembe ghakaiwo i vanivana na inja ghinda thari gharavakatha. Na ra ghareghare dagerawe togha ghakaiwo, iye i vanamweinda na ra rumwaru Loi e marae, ghavwenyevwenye i laghiye moli i kivwala Mbaro ghakaiwo ghavwenyevwenye.

¹⁰ Mbaro va e ghavwenyevwenye, ko iye-maenġe ghavwenyevwenye kaero iko, kaiwae mbanake dagerawe togha ghavwenyevwenye kaero i laghiye kivwala.

11 Na tembe ngoreiyeva, Mbaroko iyako ghambanja ma i molao, ko iyemaenge weiye ghavwenyevwenye. Kaero ra ghareghare dagerawe togha iye i meghabana, na ghavwenyevwenye i laghiye moli.

12 Ghareme i matuwo renuwanako thiyako kaiwanji, iya kaiwae ma wo mararu, ko iyemaenge weiye lama gharematuwo wo vavagharena Totoko Thovuye.

13 Ghime ma wo vakatha ngoreiya Mosese va i vakatha. Mbanja ghamwaeko marambwelambwelawae kaero i gheneghenenja, i liya kwama na i liyabo ghamwae na thava Isirel thi thuweya ghamwaeko.

14 Ko iyemaenge Isirel lenji renuwanako i momouwo. Na gheghad noroke, kwamako iyako i rogana lenji renuwanja, mbanja thi vaona dagerawe teuye ma valikaiwanji thi wo gharumwaru. Kwamako iyako mbe ina wevara, kaiwae mbe Kraiis ghambereghaenge ambane i liyathu.

15 Othembe noroke, mbanja thi vaona Mosese le Mbaro, kwamako mbe inawe i yabo lenji renuwanja.

16 Ko iyemaenge thela thonggo i mena weya Giya kwamako iyako ne i liyathu.

17 Giya iye Nyao Boboma. Thela thonggo Giya Une inawe, loloko iyako rakarakayathu.

18 Ghinda regha na regha ghamwanda kaero ma e ghayaboyabo iya kaiwae mbe ra njimbughathi vara Giya le vwenyevwenye. Weya amalaghiniye i viva ghandayamoyamo na ngoranda amalaghiniye, na ghinda tembe e la vwenyevwenyeva, na vwenyevwenyeko iyako

mbe i laghilaghiye vara. Giya iye Nyao Boboma le vakatha ngoreiyako.

4

Njimwa le njavovo na Loi le vurigheghe

¹ Iyake kaiwae, ma ghaminame i ghenenja e kaiwo, kaiwae Loi le gharemwaewo e tine i giya kaiwoke iyake weime.

² Ko iyemaenge simosimo na monjina vakathaniye kaero wo ndeghereiyewana. Ma wo kwaniyaronggiya gharighari na Loi le utu wo vivi na ma reghaova. Ko iyemaenge utuutu emunjoru wo vavagharena wagiyaawe, na iyake e tine wo worangiyaima gharighari e maranji na e gharenji thi ghareghare ghime kaiwo thovuye gharavakatha Loi e marae.

³ Ko iyemaenge thongo Totoko Thovuye iya wo vavagharenjako ma i manjamanjala wengiya gharighari vavana, ma i manjamanjala wengiya thiye thi longana mare memeghabaniye.

⁴ Ma thi lonweghathi kaiwae lenji renuwana kaero yambaneke ghaloi raithari i laweghathi e momouwo tine. I vakathangi ma thi thuweya manjamanjala i woya wengi i mena Toto Thovuye Krais ravwenyevwenye kaiwae, amalaghiniye ngoreiya molivara Loi.

⁵ Kaiwae budakaiya ghime wo utuna, ma ghime utuutunime, ko iyemaenge wo utu na wona, "Jisas Krais iye Giya," na "Ghime, ghemi lemi rakakaiwo Jisas kaiwae."

⁶ Loi iye va ija, “E momouwo tine manjamanjala i vakeke.” Na Loi ghamberegha iya manjamanjalawae i mbileri e ghareme, iya kaiwae wo ghareghareya le vwenyevwenye, na vwenyevwenyeko iyako wo thuwe Jisas Kraisi e ghamwae.

⁷ Na ghime ghamamberegha ngorame uye iya thi mabebe maya iya thi riyevanjara vwenyevwenye i mena weya Loi. Na iyake i vatomwe lama vurigheghe laghiye i mena weya Loi, ma i mena weime.

⁸ Iyake kaiwae e valivanjake wolaghiye wo vaidiya vuyowo, ko iyemaenge ma thi kivwalaime; nuwame thi unouno, ko iyemaenge ma mbanja regha i vakathaimo wo viyathu bigibigike wolaghiye.

⁹ E ghamathighiya, ko iyemaenge ma mbanja regha i iteteime; thi taganjonanjonaimo, ko iyemaenge Loi i vakatha na mbe e yawayawalime vara.

¹⁰ Mbanjake wolaghiye iname thari e tine na mbalama wo mare ngoreiye Jisas ko gharighari valikaiwae thi thuwe Jisas yawaliye e riwameke tine.

¹¹ Iyake kaiwae othembe mbe e yawayawalime, wo ghareghare gharighari mbwata thi tagavamareime kaiwae wo lonweghathi Jisas, na iyake mbala gharighari thi thuwe Jisas yawaliye riwame e tine, riwameke iyake tembene thi ko.

¹² Ghime lama kaiwo e tine mbe iname enge mare ele valivanja, ko iyemaenge hu wo yawalimi memeghabananiye.

¹³ Buk Boboma le rorori e tine regha iṅa, “Va ya loṅweghathi iya kaiwae va ya uturaṅgiya.” Ko kaiwae lama loṅweghathi tembe ṅgoreiyeva iyako, tembe ṅgoreiyeva wo loṅweghathi iya kaiwae wo uturaṅgiyava,

¹⁴ kaiwae wo ghareghare, Loi iye va i vakatha Jisas i thuweiru mare e tine na tembe e yawayawaliyeva. Ghime tembe ṅgoreiyeva, ne i vanḡuthuweiruime ṅgoreiya Jisas, ko amba i vanḡuime weimaṅgiya ghemi na vara ndeghathi e marae.

¹⁵ Vuyowoke wolaghiye iya thi yoyomara ke weime, ghemi lemi thovuye kaiwae, mbala i vatavatabo gharighari na thi vavaidiya Loi le mwaewo bwagabwaga na ambane ghavata ago i laghiye moli na thi wovavwenyevwenye.

Loṅweghathi gha yakuyaku

¹⁶ Iyake kaiwae ma ghaminame i ghenenja. Othembe riwameke i njanjavovo, ko iyemaenḡe unemeke mbe i totogha vara mbaṅa regha na regha e tine.

¹⁷ Vuyowoke thiyake ma i laghiye mbanake iya ubotuke iyake wo vavaidi, ko iyemaenḡe ne uneya vwenyevwenye laghiye moli na memeghabananiye wo vaidi.

¹⁸ Nuwameke ma ina weya iya bigibigi ra thuwe e marandake, ko iyemaenḡe nuwameke mbe inawe vara iya bigibigiko ma ra thuwe e marandake. Kaiwae the bigiya ra thuwe e maranda le yaku mbe mbaṅa ubotu enḡe, ko

iyemaenje budakaiya ma ra thuwe i meghabana mbanjake wolaghiye.

5

¹ Kaiwae kaero ra ghareghare mbanja ririwoke iya ra yakujake e yambaneke, iye la yonathowathowa, ne i marakaraka, Loi ne i woveinda ngolo reghava e buruburu. Ngoloko iyako ma gharighari thi vakatha e nimanji i meghabana moli.

² Mbanjake iyake ra yawaru kaiwae nuwandake nuwaiya moli Loi i woveinda buruburu ririwoniye na ra njimbo.

³ Kaiwae mbanja ne ra njimbo ririwoko thiyako, ma ra bukabuka.

⁴ Mbanja amba ra yakuyaku e riwandake iyake, ghaminandake mbe vuyowo enge na ra yawaru. Iyake kaiwae ma mbe nuwandaiya enge ra liyathu riwandake iyake na ra bukabuka, ko kaiwae tembe nuwandaiyava riwanda togha Loi i vanjimboinda, na mbala yawali ririwoniye i rothighi ririwoko iya tene i mareko.

⁵ Loi iye ghamberegha i vivatharaweinda bigibigiko thiyako kaiwanda. Iye i giya Nyao Boboma weinda na i vatomwe weinda iyake emunjoru, iya kaiwae ra ghareghare bigibigiko wolaghiye iyako va i dagerawe kaiwanda ne vara vaidi.

⁶ Iya kaiwae ghinda mbanjake wolaghiye ra gharematuwo. Kaero ra ghareghare mbanja amba ra yaku e ririwoke, ma weinda Giya ra yaku e ghambae.

⁷ Kaiwae e yambaneke ra yakuṇa e loṅweghathi, ma bigibigi buda ra thuweya e marandake.

⁸ Ngoreiye, ra gharematuwoenḡe na nuwandaiya moli thoṅgo ra roitete enḡe ririwoke iyake na ra wa vara yaku weinda Giya e ghambaeko.

⁹ Iya kaiwae, inanda gheke o inanda gheko, ko nuwandaiya enḡe ra vakatha thanavuko iya Giya i warariṅako.

¹⁰ Kaiwae taulaghike ghinda nevole ra ndeghathi Krai e marae na i vanivanḡainda. Ghinda regha na regha tembene ve vaidiya budakai le vakathako modae, ḡgoreiya ririwoke iyake le wogiyawe, i thovuye o i thari.

Yakuyaku thovuye weinda Loi weya Krai

¹¹ Kaiwae Giya ghayavwatata ina weime, iya kaiwae wo mando na wo viva gharighari nuwanji na thi loṅweghathi. Loi i ghareghare wagiya weime lama vakatha, na lo varem-inje e tine ya ghareghare ghemi tembe hu ghareghareimeva.

¹² Ma tembe ghamamberegha wo wovathovuthovuyenḡaimeva. Ko iyemaenḡe wo vakatha na valikaiwae hu sirariṅaime, mbala valikaiwae hu thombe wenḡiya thavala thi wovorevorenḡa lolo ghayamoyamo ko ma thi wovorevorenḡa budakai ina lolo ghare.

¹³ Ko ana ghime wo kabaleya? Thoṅgo ḡgoreiye, Loi ghatarawa kaiwae. Ko iyemaenḡe thoṅgo nuwame i rumwaru, ghemi lemi thovuye kaiwae.

¹⁴ Krai i gharethovuḡaime na le gharethovuko iyako i mwanavairiime na wo kaiwo, kaiwae e lama ghareghare, lolo regha ghamberegha va i rothiinda na i mare taulaghike kaiwanda, na le mareko iyako e tine taulaghike ra marewe.

¹⁵ Krai va i mare taulaghike kaiwanda, valikaiwae e yawayawalinda na thava ra yakunḡa ghandamberegha la thovuye kaiwae, ko iye-maenge ra yakunḡa enge Krai le thovuye kaiwae, kaiwae va i mare na tembe i thuweiruva ghinda kaiwanda.

¹⁶ Iya kaiwae e mbanḡake iyake na i ghaoko, ma lolo regha gharerenuwanḡa wo renuwana ḡgoreiya yambaneke gharighariniye lenji renuwana. Emunjoru Krai gharerenuwanḡa va ḡgoreiyako weime, ko iyemaenge e mbanḡake iyake kaero ma wo renuwana ḡgoreiye.

¹⁷ Thonḡo lolo regha kaero i tubwe weya Krai, iye i tabo lolo togha; yawali teuye kaero ikowe, na yawali togha kaero inawe.

¹⁸ Vakathake iyake i mena weya Loi, na weya Krai kaero i vanḡunjoghainda weya amalaghiniye ghamwanda regha. Na i wogiya namoghamwanda kaiwoniye na wo kaiwonḡa.

¹⁹ ḡgoreiyake: weya Krai Loi va i vakavakatha gharigharike wolaghiye ghaunengi. Va i numoten na i renuwana vaghalawa lenji thari. Kaerova i giya kaiwoke iyake weime na wo utunḡa totoke iyake wonḡa, “Loi nuwaiya taulaghike ghinda ghamwanda vanaora weinda.”

²⁰ Iya kaiwae ghime Krai ghaliḡae na ḡgoreiye Loi tembe ghamberegha i nanḡo

vurigheghe wenḡiya gharighari na thi menawe. Kraiſ e idae wo nanḡonḡa na hu njoghaweſa Loi.

²¹ Kraiſ ghamberegha ma mbaḡa regha i vakatha thari, ko iyemaenḡe Loi i vakatha iye i wo lama thari na mbala thonḡo ra tubwe weya Kraiſ ghinda ra wo Loi le rumwaruko.

6

¹ Kaiwae ghinda Loi le valirakakaiwo, wo ḡaevairinḡa kaiwae va hu wo Loi le mwaewo bwagabwaga, thava i tabo bigi bwagabwaga e ghemi.

² Kaiwae Loi inḡa:

“Wo mbaḡa thovuye e tine iyava ya woraweya lo renuwaḡa, ya lonḡweya len nanḡo na va ya gharevirinḡe.

Na ya thalavunḡe e mbanako iyako va i vutha iya ya vamorunḡe.”

Wo hu vandene! Mbanake iyake Loi le ghareviri ghambaḡa, noroke iye le vamoru ghambaḡa.

Pol gha vuyowo i woranḡiya iye Loi le rakakaiwo

³ Ma nuwameiya lolo regha i wovatharithariḡa lama kaiwoke, iya kaiwae thava wo vakatha ghamba thalativa regha lolo regha e marae.

⁴ Ko iyemaenḡe e lama vakathake wolaghiye tine wo woranḡiyaime ghime Loi le rakakaiwo, mbaḡa vuyowo, viri na gharighari lenḡi vakatha rarithari weime wo ghatanḡathi.

⁵ Thi gabogabonḡaime, thi vanḡuraweime e thiyo, thi vakatha wabwi na thi vageime, wo

kaiwo laghiye moli, ma wo ghenevun; na bada i ghariime.

⁶ Wo woranjiyaime ghime Loi le rakakaiwo, kaiwae ghamathanavu i rumwaru, e lama ghareghare Toto Thovuye kaiwae, wo rouda, ghamathanavu i thovuye wenjiya ghamaune, Nyao Boboma i vavurigheghejaime, wo gharethovunji gharighari,

⁷ wo utuutu emunjoru, na Loi ele vurigheghe tine wo kakaiwo. Thanavu rumwaru iye ngoreiya lama gaiti biginiye ina e nimameke unemeke na e moimeke.

⁸ E lama vakathake wolaghiye tine wo woranjiyaime ghime Loi le rakakaiwo: Gharighari vavana thi taraweime, na vavana thi yangiwanaima; vavana thi utu vathara utuutunime na vavana thi wovathovuthovuyenjaime. Gharighari thijava ghime rautukwanikwan, ko iyemaenge ghime rautuutu emunjoru moli;

⁹ thijava ma e idaidame, ko iyemaenge gharighari lemoyo thi ghareghareime; mbanjake wolaghiye wo yakuyaku mare ele valivanja, ko iyemaenge mbe e yawayawalime. Thi tagavakowanaima moli, ko iyemaenge ma thi tagavamareime.

¹⁰ Wo vaidiya nuwathari, ko iyemaenge mbanjake wolaghiye wo warawarari; wo tabo mbinyembinyengu, ko iyemaenge wo vakathangiya gharighari lemoyo thi vwenyevwenye; ma e lama bigibigi, ko iyemaenge wo riyevanjara e bigibigike wolaghiye.

Ra yaku na ghamwanda vanaora

¹¹ Ghemi Korinita, bigibigike wolaghiye kaero wo utuvao wenga, ma wo ravunyivunyi mun regha wenga, na ghamigharethovu i laghiye moli e gharemeke.

¹² Ghami gharethovu e gharemeke ma e ghata-gagana, ko ghemienge ghime ghamagharethovu e gharemina e ghatagagana.

¹³ Valikaiwae hu gharethovuime. Ya rorori ngoreiye ghemi lo gamagai.

Thava ra tubwe na regha weindangiya thiye ma thi lonweghathi

¹⁴ Thava weimiyangiya thavala ma thi lonweghathi hu kaiwo na regha o hu tubwe na regha. Thare valikaiwae thovuye na thari thi kaiwo na regha? Thare valikaiwae manjamanjala na momouwo thi yaku na regha?

¹⁵ Thare valikaiwae Krais na Seitan thi vighathi? Thare valikaiwae ralonwelonweghathi na ma ralonweghathi lenji renuwanja regha?

¹⁶ Thare valikaiwae Loi le Ngolo Boboma na loi vatavatad thi yaku na regha? Kaiwae ghinda Loi e yawayawaliye le ngolo, ngoreiya Loi ghamberegha va inja,

“Ne ya yaku wenguyangi na ya longalonga e tinenji.

Ghino ya tabo lenji Loi na thiye thi tabona lo gharighari.”

¹⁷ Loi mbowo injava,

“Iya kaiwae hu roitetengi na hu meghaghathi.

The bigibigiya thi mbighi e marangu thava
hu vighathingi,
na mbala ya vanguvathana e ghino.

¹⁸ Na ghino ghemi Ramami na ghemi ghino
lo nganga.”

Loi Vurivurighegheniye ghalinjaya iyako.

7

¹ Wouna valigharegharengu, kaiwae dager-
aweko thiyako Loi va i dagerawe kaiwanda,
thanavuke raraithari wolaghiye iya thi vam-
bighiya riwandake na unendake ra viyathungi
na ra kakaleva. Yawalindake yakuyakuniye mbe
i rumwaru Loi e marae ghayavwatata kaiwae.

Pol le warari Korinita kaiwanji

² Mbe hu gharethovu weime. Mava wo
vakatha vathari weya lolo regha, ma wo
vakowana lolo regha le thovuye, ma wo valogha
lolo regha nuwae na wo mbana le bigibigi.

³ Ma ya utuna ngoreiyako kaiwae yana
ya wonjowenga. Kaero ma utuvao wenga,
ghamigharethovu i laghiye moli e gharemeke,
kaiwae othembe ra mare na regha o e
yawayawalinda, mbe wo ra gharethovunga vara.

⁴ Gharengu i matuwo kaiwami. Ghemi ghino
lo ghamba sirari na hu vavurigheghenango.
Othembe wo vaidi vuyowo i ghanagha, warari
i riyevanjarango.

⁵ Mbanja wo mena Masedoniya ele valivanja
tine, ma valikaiwame wo towo. Iyemaenge
vuyowo tomethi na tomethi thi vorovoro weime.

E riwameke eto gharighari thi gaithi weime, na e riwame maya mararu gharenuwana kaiwami i yaku e ghareme.

⁶ Ko iyemaenge Loi, iya i vavurigheghena ranuwathari, iye i vavurigheghenaime Taitus le vutha weime.

⁷ Ma mbe le vuthake enge kaiwae na i vavurigheghenaime, ko iyemaenge Taitus le ututu weime ghemi kaiwami, kaiwae i utuna ghemi va hu vavurigheghena na i giya yanawame nuwamiya moli hu thuwengo. I dage weime nuwami i thari lemi vakatha raithari kaiwae na lemi vatomwe ghamimberegha nuwamiya hu thalavungo. Totoko iyako i vavurigheghenango laghiye moli.

⁸ Letako iyava ya roriko, othembe i thivathara nuwami, ma va nuwathari na e ghino. Ko ya nuwathari kaiwae mbema mbanja ubotu enge letako iyako i vanuwatharijanga.

⁹ Ko iyemaenge mbanake ya warari, ma kaiwae ya vakathana hu nuwathari, ko kaiwae lemi nuwatharina i vakathanga hu ndeghereiyewana lemi thari. Lemi nuwathariko iyako va ngoreiya Loi nuwaiya, na lama vakathako e tine ma wo vakowananga.

¹⁰ Kaiwae nuwathari ngorako Loi nuwaiya, uneya ra ndeghereiyewana la thari mbala ra vaidiya vamoru. Na ma lolo regha i nuwathari iyako kaiwae. Ko iyemaenge vaga nuwathari ngoranjiya yambaneke gharighariniye thi vakavakatha uneya mare.

¹¹ Ko iyemaenge lemi nuwathari iyava ngoreiya Loi nuwaiyako une thovuye wo hu

thuwe e yawalimina. Kaero hu rovurigheghe kaiwo thovuye e tine, kaero hu yondoviri na hu vatomwenjiya gharighari ghemi ma e ghamiwonjowe, loloko iya i vakatha thariko kaero hu marakowana le thariko na hu mararu ne iwaenge thariko iyako i vakowananga, nuwamiya moli hu thuwengo, hu vatomwenja na nuwamiya hu thalavungo, na va hu rovurigheghe the lolo i vakatha thari le thariko modae i vaidivao. Lemi vakathako wolaghiye i worangiyanga ghemi ma lolo regha valikaiwae i wonjowenga.

¹² Mbanja ya roriya lemi leta, ma ya rerenuwana ya vathanavuya loloko iyava i vakatha thariko o the lolo iya i vakatha tharikowe ya vawararija. Va ya roriya letako iyako kaiwae nuwanguiya Loi e marae hu thuwe emunjoru hu gharethovunjaime na hu rovurigheghe kaiwame.

¹³ Iya kaiwae ghamithanavuko iyako i vavurigheghenjaime.

Emunjoru othembe wo vaidiya vuyowo i ghanagha, hu vawararijaime. Ko iyemaenge wo warari laghiye kaiwae Taitus le warariko i vawararijaime, na iyake kaiwae hu vakatha na amalaghiniye ghare i dinja.

¹⁴ Va ya wovorevorenanga weya amalaghiniye, na lemi vakathana kaero i vamboromboro lo utuutuwe. Iya kaiwae ma ya monjina, kaiwae lama utuutu wolaghiye e ghemi emunjoru, na tembe ngoreiyeva lama wovorevorenanga weya Taitus i tabo emunjoru.

¹⁵ Iya kaiwae mbanjake amalaghiniye le

gharethovu wenga i laghiyeva kaiwae i renuwanakiki ghemi weimiyangiya lemi yavwatata hu vanjguvatha na hu ghambu le utuutu.

¹⁶ Ya warari kaiwae bigibigike wolaghiye e tine valikaiwanju ya vareminjenja.

8

Mwaewo ghabigirawe

¹ Lama bodaboda, nuwameiya wo giya yanawami na hu ghareghare Loi le mwaewo une ngoronga ekelesiya wengi Masedoniya ele valivanja tine.

² Kaiwae othembe ghanjimando laghiye moli lemoyo thi vaidingi na ma e lenji bigibigi, warari laghiye i mwanavairingi na mbala thi bigiraweya lenji mwaewo laghiye lenji valiralonwelonweghathi kaiwanji.

³ Ya utu emunjoru e ghemi, bigibigiko iya inako wengi na valikaiwanji thi mwaewowe, kaero thi bigirawe, na thi bigirawe e vwatae, na thi kivwala iya ghanjighadiko. Ma lolo regha i dage wengi na thi vakatha, mbe thiye engevara lenji renuwanja e tine thi vakatha.

⁴ Thi nanjo vurigheghe weime na wo vatomwe wengi na weinjyangiya ekelesiya e valivanja vavanava na thi vakatha thalavu i wa wengiya Loi le gharighari Judiya e tine.

⁵ Ghime lama renuwanja wo munje enge mbe thi bigirawe enge lenji mwaewo. Ko iyemaenge lenji mwaewoko i kivwala lama renuwanja, kaiwae iviva mbowo thi vatomwengi weya Giya, na

tembe ngoreiyeva ghime weime ngoreiya Loi le renuwanja.

⁶ Iya kaiwae, kaiwae Taitus iye kaerova i woraweya kaiwoko iya i mbanimba mwaewoko righe, wo dagewe na mbowo i ghaonava na i thalavunga na hu vakathavao lemi mwaewona.

⁷ E thanavuke wolaghiye ghemi hu vurigheghe moli — e lonweghathi, e utuutu, e ghareghare, e lemi rovurigheghe na e lemi gharethovu weime. Na tembe ngoreiyeva wo hu vurigheghe e mwaewo ghavakavakatha.

⁸ Ma ya utu ngoreiyako na ya woraweya ghamimbaro na hu vakatha ngoreiye. Ko iyemaenge nuwanguke nuwaiya hu ghareghare gharighari vavanava nuwanjiko nuwaiya thi thalavu. Iya kaiwae thongo hu vakatha ngoranjinyiako, ne ya ghareghare lemi gharethovu i emunjoru moli.

⁹ Kaiwae kaero hu ghareghare ghandi Giya Jisas Kraisi le mwaewo bwagabwaga. Othembe iye va ravwenyevwenye e buruburu, ko iye-maenge ghemi kaiwami i njama na i tabo mbinyembinyengu. Va i tabo mbinyembinyengu na mbala ghemi hu vwenyevwenye.

¹⁰ Ghino lo renuwanja mbala hu vakatha ngoreiyake. Theghathaghako ikoko hu viva na nuwamiya hu thalavu kaiwoke iyake na tembe hu woraweyava kaiwoko righe.

¹¹ Mbanjake hu vakathavuna kaiwoko iyako. Va lemi renuwanja ngoreiye na nuwamiya hu mwaewo, ko lemi vakathana mbema i vam-boromborona enge lemi renuwanjana.

Hu vakatha ngoreiya budakai ina wenga.

¹² Kaiwae thonjo nuwamina nuwaiya moli hu mwaewo, Loi i wovatha lemi mwaewona. Loi i goru weya budakaiya ina weinda, ma i goru weya budakai ma ina weinda.

¹³ Ma lama renuwanja ngoreiye ghemi hu vaidiya vuyowo na i maya wenjiya thiye ne thi wo mwaewoko, ko iyemaenge nuwameiya taulaghina ghemi hu mboromboro.

¹⁴ Kaiwae e mbanjake iyake ghemi hu riyevanjara na gharighariko thiyako iya i tuboko wenji valikawaiye hu thalavunji. Kaiwae mbanja muyai ghemi mbwatane i tubo wenga, ko amba thiye e lenji bigibigiko tembe thi thalavungava, na mbala hu mboromboro,

¹⁵ ngoreiya Buk Boboma le woranjiya thiye thi mbana manna kaiwanji, inja, "Thavala thi mbana laghiye, ma reghava inawe, na thavala thi mbana seiwo mane i tubo moli wenji."

Taitus gharathalavu mwaewo ghamban kaiwae

¹⁶ Ya vata agoweya Loi, kaiwae i woraweya ghamigharethovu Taitus e ghare na nuwaiya moli i thalavunga ngoreiya ghino ya gharethovu e ghemi.

¹⁷ Kaiwae Taitus i wararija lama renuwanjake na i ghaona e ghemi na i vakatha ngoreiye weiye le gharevatomwe na ghamberegha le renuwanjako tine nuwaiya i ghaona e ghemi.

¹⁸ Na ghaghanda regha tembe iyava wo variye na i ghaona weiye Taitus. Iye le kaiwo Toto Thovuye kaiwae ekelesiyake wolaghiye thi ghareghare na thi tarawe.

19 Tembe ngoreiyeva ekelesiya e valivangake iyake va thi tuthiya amalaghiniye na weime wo vaghiliya na wo mbana mwaewoke iyake wo yamban wenjiya ghandauneko. Wo vakavakatha kaiwoke iyake kaiwae nuwameiya Giya ghatarawa i laghiye na gharighari thi ghareghare nuwameiya moli wo thalavunjiya ekelesiya.

20 Weime lama gharelaghilaghi iya wo njimbukikiya mwaewoke laghiye iyake, kaiwae wona ne iwaenge gharighari thi wonjoweime ghamamberegha wo thalavuime. Iya kaiwae wo vangwa ghaghandake iyake na weime wo wa.

21 Kaiwae wo rovurigheghe na wo vakatha vakatha thovuye, ma mbe Giya enge e marae, ko iyemaenge gharighari tembe e maranjiva.

22 Tembe wo variyeva ghaghanda reghava na theghetoninji thi ghaona. Iye mbanja i ghanagha e kaiwo regha na regha tine wo thuwe weiye le gharevatomwe nuwaiya moli i kakaiwo. E mbanjake iyake i vareminjenga ne hu vakatha wagi yawe, na weiye le warari laghiye moli na nuwaiya i thalavunga.

23 Taitus kaiwae, iye lo valirakakaiwo wo kaiwo kaiwami. Na oghaghanda theghewo weinji thi ghaona, na thiye ekelesiya i tuthinji na e idanji thi ghaona, na lenji kaiwo e tine Krai ghatarawa mbe i vorovoro vara.

24 Iya kaiwae hu woranjiya lemi gharethovuna wenji, na mbala thiye na ekelesiya wabwike wolaghiye thi ghareghare lama wovorevorenjanga i emunjoru.

9

Thalavu ralonwelonweghathi vavana kaiwanji

¹ Ma valikaiwae mbema ya rorori enge leta e ghemi na ya vavurigheghenga Loi le gharighari ghanjithalavu kaiwae valivanga Judiya e tine.

² Kaiwae ya ghareghare ghemi nuwamiya moli hu giya nimami. Ghemi Masedoniya le valivanga ya wovorenanga, yana, “Thiye Korinita, Akaiya ele valivangana tine, kaero mendava thi vivatha theghatheghako ikoko e tine na thi vakatha mwaewoke iyake.” Lemi gharevatomwena i mwanavairingi, na taulaghiko mbalama tembe thi mwaewova.

³ Ko iyemaenge ya variyengiya oghaghandake thegheto thiyake e ghemi, kaiwae ma nuwanguiya lama wovorevorenangake i tabo utu bwagabwaga. Nuwanguiya mbanja ne ya ghaona lemi vivathana kaero inawe ngoreiya lo utuutu wengiya Masedoniya ekelesiya.

⁴ Iyemaenge thonngo weinguyangiya Masedoniya gharighariniye vavana wo ghaona na thi vaidinga amba ma hu vivatha, ne wo monjina lama gharematuwo na lama wovorenanga kaiwae. Na ghemi tembene hu monjinava.

⁵ Iya kaiwae ya renuwanja valikaiwae wo ya variyekangiya oghaghandake iyake wo thi viva e ghemi na thi thalavunga hu vanamwe mwaewoko iyava hu dageraweko, na ne mbanja ghino ya vutha wenga mwaewoko kaero hu vivathavao. Na mbala gharighari thi ghareghare hu bigiraweya mwaewoko e lemi gharevatomwe

tine, na ma ghime e lama vavurigheghejanga e tine.

⁶ Wo hu renuwanakikiya utuutuke thiyake: thela thonjo i ghavwa seiwo, le uloulo tembene seiwova, na thela thonjo i ghavwa laghiye le uloulo tembene i laghiyeva.

⁷ Ghemi regha na regha mbala i giya ngoreiya mbe ghamberegha vara va i woraweya le renuwanja e ghare. E lemi giya e tine thava weiyem lemi nuwathari, na thava hu vavurighegha lolo na i giya. Kaiwae Loi i gharethovu weya loloko iya weiyem le warariko na i giya.

⁸ Loi iye veimaima na ndendewo na valikaiwae i giya le mwaewo wolaghiye e ghemi ne i riyevanjara na i ndendewo e ghemi, na mbala mbanake wolaghiye bigibigike wolaghiye mbe valikaiwami enge, na i ndendewo na valikaiwami hu vakatha kaiwoke thovuthovuye wolaghiye.

⁹ Ngoreiya Buk Boboma le utuutu inja, "Va i giyayathu le mwaewo laghiye mbinyembinyengu wenji, le vakathako iya i rumwaruko i meghabanawe mbanake wolaghiye."

¹⁰ Loi, iye ghamberegha i giya weiwo weya rak-abukabu na i vakatha i tabo ghanjanga kaiwanji, amalaghiniye ne i valaghiyeva lemi bigibigi na mbala valikaiwami hu thalavunjiya mbinyembinyengu.

¹¹ Loi iye ne i vakathanga hu madi na mbala valikaiwami mbanake wolaghiye hu mwaewo wenjiya mbinyembinyengu. Na gharighari

lemoyo ne thi vata agowe lemi mwaewoko iyako kaiwae mbanja mwaewoko iyako thi mban ghime e nimame.

¹² Kaiwae iya kaiwoko hu vakathako uneya theghewo: mbinyembinyengu ne thi vaidi budakaiya i kwara wengi. Na tembe ngoreiyeva vata ago weya Loi ne i mbuthu na i laghiye.

¹³ Kaiwae lemi vakathako ne i worangiya kaero i vaemunjoruna lemi lonweghathi, ambane gharighari lemoyo thi tarawe Loi, kaiwae Krai Totoniyeye Thovuye iya hu ndethina hu ghambu. Na ne thi tarawe Loi kaiwae lemi gharevatomwe e tine hu giya lemi mwaewo wengi, na gharigharike wolaghiye wengi.

¹⁴ Na tembene thiye thi nangova kaiwami na ghamirerenuwana i laghiye e gharenji, kaiwae hu riyevanjara Loi le mwaewo na e vwatae.

¹⁵ Ya tarawe Loi le mwaewo kaiwae, na mwaewoko iyako le laghilaghiye ma valikaiwae ra utuna.

10

Pol i utuutu le kaiwo ghayongi kaiwae

¹ Ghino Pol ya nango e ghemi e mbanjake iyake kaiwae gharighari vavana thina, “Mbanja Pol i yaku weinda i maramararu na i thethenuwo, ko iyemaenge thonjo i mebwagabwaga weinda ghare i matuwo na le utuutu i vurigheghe.” Ko iyemaenge Krai le gharenja na gathanavu i ghenenja e tine iya ya nangoke e ghemi.

² Ya nango vurigheghe e ghemi mbanja ne ya ghaona, hu njimbukikinga na thava ghamithanavuna kaiwae na ghalinjangu i

vurigheghe e ghemi. Ya renuwaṅa ghalinṅu i vurigheghe wenḡiya ghamunena, iya thiṅanava ghino ya lonḡalonḡa yambaneke ele renuwaṅa tine.

³ Emunjoru wo yaku e yambaneke ko iye-maenḡe ma yambaneke le rerenuwaṅa e tine wo rorogaithi.

⁴ Lama gaithi bigibiginiye ma ḡgoreiya yambaneke le gaithi bigibiginiye, ko iyemaenḡe lama gaithi bigibiginiye lenji vurigheghe i mena weya Loi na valikaiwae i vakowanḡḡi ghathighiya lenji wowogaithi vurigheghe ḡgoreiya gharighari thi vakowanḡḡiya gaithi ḡgolongoloniye.

⁵ Renuwaṅa kwanikwan na utu wovorevorenḡa wo tagarakaraka, iya i vakatha gharighari thi tivawe na Loi ghaghareghare thava ina wenḡi. Gharighari lenji renuwaṅako wolaghiye wo yakiḡi, mbala valikaiwanji thi renuwaṅa bigibigi wolaghiye ḡgoreiye Krai le renuwaṅa.

⁶ Na mbaṅa hu ghambugha lama utuutuke wolaghiye, ghime kaero wo vivathavao na gharighariko iya thi botewoyathu lama utuutuko wo lithi wenḡi.

⁷ Thava mbe hu thuwe enḡe bigi eto. Thonḡo lolo regha ina ghenḡa i renuwaṅa iye Krai le lolo, wo i renuwaṅa vakatha, kaiwae ghime tembe ḡgoreiyeva — Krai le gharighari ḡgorameya amalaghiniye.

⁸ Giya i giya mbaro weime na wo kaiwo. Kaiwae othembe seiwo wo wovorevorenḡaime mbaroko iyako kaiwae, gharighari mane thi vakatha na ya monjina. Kaiwae Giya i wogiya

weime na wo vatada lemi loŋweghathi, na mane wo mwanarakaraka e ghemi,

⁹ Ma yaŋa iyake ma nuwanguiya lemi renuwaŋa huŋava ya mando na ya vamararunŋa elo letanŋike.

¹⁰ Kaiwae gharighari vavana thiŋa, “Pol le letanŋiko thi vurigheghe na thi vuyowo, ko iyemaenŋe mbaŋa thonŋo ra thuwe e maranda, ma ele vurigheghe na mbema i utu bwagabwagaenŋe.”

¹¹ Gharighari ŋgoranjiyako mbema thi ghareghare enŋe, mbaŋa ne wo ghaona, lama vakatha ne i mboromboro e lama utuutu leta e tinenji mbaŋa wo meghaghathi e ghemi.

¹² Ghamune vavana tembe ghanjimberegha thi wovathovuthovuyenanŋi e ghemi. Ghime ma nuwameiya moli wo vavano weimanŋi, kaiwae mbaŋa ghanjimberegha thi vavanonŋi, na e tine thi vevavanonŋi. Lenji vavano thovuye kaiwae ŋgoreiye ghanjithanavu. Thiye ma e lenji ghareghare.

¹³ Ko iyemaenŋe ghime ma valikaiwame wo kivwala ghamaghad na tembe ghamamberegha wo wovorenaima. Mbe wo utuutu enŋe vara iya e kaiwoko Loi va i woveimeko na gheghad. Kaiwoko iyako e tine regha iya ghemi Korinita.

¹⁴ Iya kaiwae ma valikaiwae ya kivwala wo ghadiko, mbaŋa wo wovorenaima lama kaiwo kaiwae Korinita e tine, kaiwae emunjoru moli iviva wo utuŋa Toto Thovuye Krai utuniye gheni.

¹⁵ Na ma woŋa vavana lenji kaiwo iye lama kaiwo mbala valikaiwae wo wovorenaima. Ko

iyemaenge nuwamiya lama kaiwo e tinemina ne iko. Amba valikaiwami hu thalavuime

¹⁶ mbala valikaiwame wo vavaghareña Toto Thovuye e vanautuma inanji Korinita valivanga e yalasiko. Ma valikaiwae wo wa e valivanga kaero ghandane vavana thi kaiwovaowe, na amba wo wovorevorenjame mbe lolo regha le kaiwo une kaiwae.

¹⁷ Ko iyemaenge ngoreiya Buk Boboma le ututu ina, "Thela thongo nuwaiya i wovorevorenja, mbala i wovorevorenja enge Giya."

¹⁸ Kaiwae ma thiye ghanjimberegha thi wovorevorenjani iya Loi i wovathovuthovuyenjani, ko iyemaenge thiye amalaghiniye i wovorevorenjani.

11

Pol na Jisas ghalinjae gharaghambi kwanikwan

¹ Nuwanjuiya mbala hu ghatanaghathi e ghino othembe ne hu lonweya lo utuutuke ngoreiya unouno lenji utuutu. Hu ghatanaghathigha lo vakathako iyako!

² Ghino nuwanjuiyanga moli na ya rovirigheghe kaiwami, ngoreiya Loi nuwaiya moliya ghemi. Kaerova ya vakatha ghamidagerawe na hu vanjwa ghimoru regha, iye KraiS ghanberegha, na nuwanjuiya ya vanjugiyangawe ngoramiya thinabwethubwethuru kalekaleva.

³ Hu renuwanjakiki ngorongwa mwatako le thimba e tine i yarogha Ive. Ya gharelaghilaghi ghemi kaiwami ne ngorami Ive na Seitan i

valogha nuwami na hu roiteta lemi gharethovu Krai kaiwae, iya i rumwaru na i riyevanjara.

⁴ Ya gharelaghilaghi kaiwami kaiwae kaero ya thuwe mbaṅa mbe gharighari vavana thi ghaona, hu ghatanaghathigha lenji vakathako. Thiye thi yaronga na thi vavagharena mbe Jisas regha wenga, ma ngoreiya ghime wo vavagharena wenga. Na tembe hu wova nyao mbe regha lenji vavaghare e tine, ma ngoreiya Nyao Boboma iyava hu woko weime. Na tembe hu wova toto thovuye mbe regha, ma ngoreiya Toto Thovuye Jisas Krai kaiwae iyava hu woko weime. Na weimi lemi warari hu wovathanji lenji totoko.

⁵ Gharighariko thiyako thiṅa thiye ghanjimberegha ghalinae gharaghambi laghiyeninji, ko iyemaenge emunjoru ma thi kivwalango.

⁶ Mbwata ghino ma rautuutu thovuye ngoreiye, ko iyemaenge emunjoru ya ghareghare Loi le utuutu. Mbanake wolaghiye na lama vakathake wolaghiye e tinenji valikaiwami hu thuwe iyake.

⁷ Mbaṅa va ya vavagharena Toto Thovuye i mena weya Loi, mava ya nango weya modae e ghemi, ko iyemaenge va ya wonjonango na ghemienge ya wovorenanga. Na ngorongana lemi renuwanja i tharako?

⁸ Ya vaidiya wo thalavu wenjiya ekelesiya vavana, ngoreiya ya vakaivinangi mbala valikaiwangu na ya kaiwo ghemi kaiwami.

⁹ Na mbaṅa va inanḡu ghenaweinḡuyangiya ghemi na ya kwara e bigi regha, mava ya wogiya vuyowo weya ghemina regha. Oghaghanda

vavana thi mena Masedoniya, thiye thi vam-boromboro na thi bigimena e ghino. Iya kaiwae ma mbaņa regha ya woraweya wovuyowo e ghemi, na mbaņa i menamena e ghamwandako mane tembe ya vakathava ngoreiye.

¹⁰ Krai iye rautuutu emunjoru, na ghino tembe ngoreiyeva tembe ya utuva emunjoru, na ghena Akaiya* ele valivangako wolaghiye tine ma lolo regha ne i ravaghango lo wovorevorenango kaiwae.

¹¹ Buda kaiwae va ya woraweya lo righe na ma ya giya wo vuyowo wenga? Kaiwae ma ya gharethovunanga? Nandere! Loi i ghareghare ya gharethovunaga.

¹² Ma mbaņa regha ne ya mbana mwaewo e ghemi. Nuwanguiya ya vakathambela renuwanako iyako, kaiwae nuwanguiya ya kitena gharigharina thiyena lenji wovorevorenana, iya thiņanava thiye thi mboromboro weimangi.

¹³ Kaiwae gharighari ngoranjyako thiye ghalinae gharaghambi kwanikwan, na lenji kaiwo e tine mbe kwan enge, na ghanjiyamoyamo thi vakatha thiņava thiye Krai ghalinae gharaghambi.

¹⁴ Ma ghareyo weingu iyako, kaiwae Seitan tembe ghamberaghava i vakavakatha ngoreiya iye nyao manjamanjalaniye.

¹⁵ Ma valikaiwae gharenda i yo thongo ghalinae gharaghambi kwanikwan thi vakatha ghanjiyamoyamo ngoreiya thiye thanavu

* **11:10** Akaiya iye provins regha Eisiya e tine na ghembra Korinita ina e tine.

rumwaru gharakakaiwo. Ne mbanja ele ghambako thi wo lenji kaiwoko modae ngoreiya lenji vakathako.

Pol i utunja vuyowoko i vaidiko utuninji

¹⁶ Mbowo ya utunjava budakaiya kaero ma utunja. Thava lolo regha i renuwana na injava unouno ghino. Ko iyemaenge thonjo kaero lemi renuwana ngoreiye, wo hu lonwe enge ya wovorevorenja, kaiwae emunjoru hu lonwe enge gharighariko thiyako lenji wovorevorenja.

¹⁷ Wovorevorenjake iya ya utunjanjike, ma ngoreiya Giya le renuwana, ngoreiya unouno lenji utuutu.

¹⁸ Ko iyemaenge gharighari lemoyo nanji ghenana, tembe ghanjimberegha thi wovorenjani yambaneke gharighariniye e lenji utuutu, na ghino tembe ngoreiyeva wo ya wovorevorenja.

¹⁹ Kaiwae hu munjeva ghemi rathimbathimba laghilaghiye, weiye lemi warari hu ghatanaghathinji raunounonji.

²⁰ Othembe gharighari vavana thi mbanimbanilolonga wenga, lenji thovuye kaiwae thi vakaiwonanga, thi kwaniyaronga, tembe ghanjimberegha thi wovorenjani e marami na thi tagalevanga, lenji vakathako iyako hu ghatanaghathi mbe thi vakavakathavara.

²¹ Weinju lo monjina ya vata sori lama njavovo kaiwae ma wo vakowananga mun ngoreiyako!

Ko iyemaenge thonjo ghalinae gharaghambi kwanikwan regha weiye le gharematuwo na

i wovorevorenja, ghino tembe ngoreiyeva valikaiwanju gharenju i matuwo na ya wovorevorenja. Lo utuutuko iyako ngoreiye unouno lenji utuutu.

²² Ko ana thiye Hibru gharighariniye? Ghino tembe ngoreiyeva. Ko ana thiye Isirel gharighariniye? Ghino tembe ngoreiyeva. Ko ana thiye Eibraham orumburumbuye? Ghino tembe ngoreiyeva.

²³ Ko ana thiye Krai le rakakaiwongi? (Lo utuutuke ghaminae ne ngoreiya unouno lenji utuutu.) Ghino ya kaiwo kivwalangi. Ghino lo vurigheghe i kivwala thiye lenji vurigheghe; ghino mbanja i ghanagha thi woruwongo e thiyo, ko iyemaenge thiye mbe seiwoenge; thi ngengenango, ko iyemaenge thiye mbe seiwoenge; na mbanja i ghanagha moli mbalama ya vaidiya mare.

²⁴ Mbanjalima Jiu rambarombaro thina na lenji ragagaithi thi liya thiyo vurivurighegheniye na thi yabibingowe mbanjaeto na mbanjasiwo.

²⁵ Mbanjato Rom rambarombaro lenji ragagaithi thi yabibingo, mbanjara gharighari thi biringo e varivari, mbanjato wangako ya thako wengi thi dune na thi marakaraka, na mbanja regha gougou regha na ghararaghiye regha wo ghaghavorenja e njighi vwatae.

²⁶ Mbanja i ghanagha va lo longalonga valivanga bwagabwaga. Mbanja lemoyo ya vaidiya thari e tine e walaghitangi, rakaivi wengi, ghambangu gharighariniye wengi na gharighari eto wengi. Mbanja lemoyo ya vaidiya thari e tine e ghembaghamba laghilaghiye

tinenji, e njamnjamibwaga, na e njighi vwatae. Na mbaṅa lemoyo tembe ya vaidiva thari e tine wenḡiya woune kwanikwan.

²⁷ Ya vakathangiya kaiwo thiya vurigheghe na mbaṅa i ghanagha ma ya ghenā mun. Mbaṅa vavana bada na mbwa thi gharinḡo, na mbaṅa i ghanagha ma ya ghaninḡa; mbaṅa vavana ya wariri kaiwae wo kwama ma valikaiwae.

²⁸ Na ma mbe bigibigi thiyēke enḡe, mbaṅa regha na regha ya vuyowo mbaṅa ya rerenuwāṅa laghiye ekelesiya ghanjinjimbukiki kaiwae.

²⁹ Thonḡo lolo regha le lonḡweghathi i njavovo, gharenḡu i njawe laghiye. Thonḡo lolo regha i dobu thari e tine, kaero nuwanḡu i thari laghiye.

³⁰ Ma nuwanḡuiya ya wovorevorenḡo, ko thonḡo ḡoreiyako, ya wovorevorenḡo lo njavovoko kaiwanji.

³¹ Loi, iye Giya Jisas le Loi na Ramae, i ghareghare ma ya kwan. Iye ra tarawe idae mbaṅake wolaghiye ma ele ghambako.

³² Ko ya utuṅa bigi regha e ghemi. Damasiko e tine Kin Aritas le gawana i bigirawenḡiya ragagaithi e ghembako ghagana, e ghamba ranḡi regha na regha wenḡi na thi njimbukiki, na mbaṅa ne thi thuwenḡo, thi lawenḡo na thi yakininḡo.

³³ Ko iyemaenḡe woune vavana thi vakuki njonḡo e nambo e doda regha e ghambako ghagana mborowa, na ya voiteta gawanako le mbaro na ma i ḡarinḡo.

12

Pol ghavavaghare na ghavuyowo regha

¹ Ne ya wovorevorenja, othembe ma e ghathovuye, ko iyemaenje mbowo ya utu ghaova, na wo ya utunjanjiya wovavaghare na wovatomwe, iya Giya Jisas va i wogiyako e ghino.

² Ya ghareghareya lolo regha, iye i lonweghathigha Kraiss, theghathegha hoyaworo na umbovari kaero iko na Loi va i vangu na i voro e buruburuko yavoroko moli. Ma ya ghareghare va i wa mbe e riwaekovara moli o e une. Mbe Loi ghambereghaenje i ghareghare.*

³⁻⁴ Ya ghareghare loloko iyako Loi va i vangu na i voro e buruburu, amba velonwa utuutu ngoreiye gharighari ma valikaiwanji thi utuna, na tembe e ghadageteniva thava thi utuna. Ma ya ghareghare va i wa mbe i riwaekovara moli o e une. Mbe Loi ghambereghaenje i ghareghare.

⁵ Vakatha ngoreiyako i yomara weya loloko iyako, valikaiwae ya wovorevorenja kaiwae. Ko iyemaenje ma valikaiwae ya wovorevorenjango, ko mbe valikaiwae enje ya wovorevorenja lo njavovo kaiwanji.

⁶ Kaiwae othembe thonjo nuwanjiya ya wovorevorenja idangu, lo utuutu ma ngoreiye raunouno le utuutu, kaiwae the bigiya ne ya utuna i emunjoru. Ko iyemaenje ne ya rokubaro mbala gharighari mane thi

* **12:2** Pol ma nuwaiya i wovorevorenja ghamberegha kaiwae, iya kaiwae righethoruke thiyake e tine i utuna ngoreiye bigibigike thiyake i yomarawe lolo reghava. Ko iyemaenje righethoruke thiyake i utuna Pol kaiwae.

wovorevorenjango na e vwatae. Nuwanjuiya thi wovathovuthovuyenjango lo vakatha iya thi thuwe na elo utuutu iya thi lonwe kaiwanji.

⁷ Vavaghareko iya Loi i vagharengoko ghamba numowo moli, ko iyemaenge ma nuwaiya ya sirari kaiwanji, iya kaiwae Loi i vatomwe Seitan ne i variye ghalinae gharaghambi regha ngoreiye kin i ngaungauja riwangu. E kamwathike iyake Loi i roganango thava ya sirari.

⁸ Mbanato ya nango vurigheghe weya Loi na mbala i wokiyathu vuyowoko iyako e ghino.

⁹ Ko iyemaenge i dage e ghino inja, “Lo mwaewo i vamboromboro bigibigike wolaghiye mbe i vurivurigheghe enge vara wenjiya thavala thi njavovo.” Le utuutuko iyako kaiwae ya warari laghiye ya wovorevorenjango lo njavovo kaiwanji, na mbala gharighari ne thi thuwe Kraisi le vurigheghe i yaku e ghino.

¹⁰ Iyako kaiwae mbanja thongo ya njavovo, o thongo gharighari thi yangiwanango, thongo ya vaidiya thari, o thongo thi vakatha vuyowo e ghino, o thongo ya vaidingiya vuyowo, mbe ya warari enge. Kaiwae mbanja thongo ya njavovo, mbanjako iyako Kraisi ele vurigheghe i thalavunjo na kaero ya vurighegheva.

Pol i rerenuwana laghiye Korinita kaiwanji

¹¹ Kaero ya utu wovorevorenja, mbe ngoreiye vara unounoma ghino! Ko iyemaenge ghemi iyava hu vakatha na ya utu ngoreiyako. Kaiwae valikaiwae va wo wovathovuthovuye enge i mena e ghemi, ko ma ngoreiye. Thiye ghanjimberegha thina thiye ghalinae gharaghambi

laghiye, thiņa ghino ma bigi bwagaenge. Ko iyemaenge thiye ma thi ndekivwalango moli.

¹² Mbanja va ya yaku wengga, weingu lo ghatanaghathi ya kaiwo na vakatha ghamba rotaele vavana Loi i vakathanji elo kaiwoko tine. E vakathanjike iyake e tinenji wo ghamba tuthi emunjoru ghino ghalinae gharaghambi regha.

¹³ Lo vakatha wengga i mboromboro weiye lo vakatha wenggiya ekelesiyake wolaghiye. Mbe bigi reghaenge i tomethi, iyake: ma mbanja regha ya woraweya wovuyowo wengga. Ko kaiwae ma ya vakatha vathariko iyako, hu numoyathu!

¹⁴ E mbanjake iyake ya vivivatha lo ghaona mbanatoniye e ghemi. Lo ghaona iyake mane ya woraweya wovuyowo e ghemi, kaiwae ma nuwanjuiya lemi bigibigi, mbe nuwanjuiya enge ghemi. Kaiwae gamagai ma oramanji na otatanji ghanjithalavu kaiwae, ko rama na tina enge thiye lenji nganga ghanjithalavu kaiwae.

¹⁵ Iya kaiwae ya warari laghiye ya thivaiya lo vwenyevwenye na tembe ngoreiyeva ya thivaiya lo vurigheghe ghemi ghamithalavu kaiwae. Ghino enge ya gharethovunga laghiye, ko ngorongaenge na ghemi ma hu gharethovu wagiyaewengo?

¹⁶ Othembe va ngoreiyako, mbema emunjoru ghino ma ya woraweya wovuyowo e ghemi. Ko iyemaenge ghamune vavana thiņa, “Nuwae i rumwaru e kwan na le thimba e tine i viviinda na i mbana la bigibigi.”

¹⁷ Ngoronga? Iya gharighariko ya variyengiko e ghemi, thare weya regha ya yaronga na ya

mbana lemi bigibigi?

¹⁸ Va ya nanjo weya Taitus na i ghaona weiye ghaghanda regha. Taitus i ghaona mava i yaronja na i mbana lemi bigibigi, ae? Kaero hu ghareghare amalaghiniye na ghino wo kaiwo e renuwanja regha na wo ruku e kamwathi regha.

¹⁹ Ko mbwata hu rerenuwanja wo mando na wo ndeganaganaima e marami. Nandere moli! Ghime wo ghambu Kraisa na wo utunja Loi e marae, na bigibigike wolaghiye wo utunjanji, wouna na valigharegharenju, wo vakatha ghamivurigheghe kaiwae.

²⁰ Ya gharelaghilaghi mbanja ne ya ghaona, thare ne ya thuwenga na ma ngoramiya renuwanjako iyava ya renuwanja ghemi kaiwamiko. Na ghemi thare ne hu thuwengo ma ya reja ngoreiya lemi renuwanjana e ghino. Ya gharelaghilaghi thare ne ya vaidinga hu wowogaithi, hu yamwayamwakabu, hu ghatemuru, mbe ghamimberegha enge hu rerenuwanjanja, hu veutuutunja kwan wenga, hu utuutuvathari, hu liliya utu, hu sisirari na mevathari e tinenji.

²¹ Na tembe ya gharelaghilaghiva mbanja ne ya ghaona thare lo Loi ne i vakathango na mbowo ya monjinava e marami. Thava ne ya ghaona na gharighari lemoyo ne ya vaidingi lenji tharina iya teuyema mbe thi vakavakatha vara, ghanjithanavu raithari, lenji yathima thanavuniye, na ghanjithanavu monjimonjina mamba thi ndeghereiyewana. Thongo ne ya vaidiya thanavu ngoranjiyako amba inawe thi vakavakatha, ne ya monjina na gharenju i viri

laghiye.

13

Pol le utu vavurigheghe

¹ Lo ghaona e ghemi kaero ne mbanatoniye vara iya mbanake iyake. Wo hu rerenuwana Buk Boboma le utuutu, iya inake, “Gharighari theghewo o thegheto ne thiŋa, ‘Ngoreiye, wo thuwe,’ ko amba i vaemunjoruŋa wonjoweko iyako.”

² Kaerova ya vanuwoviriŋgiya thavala va thi vakavakatha thari mban̄a theghewoniye va inan̄gu ghen̄a wein̄guyan̄giya ghemi. Na mban̄ake mbowo ya vanuwoviriŋgiva, na mbe vavanava. Ngoreiya va lo vanuwoviriŋgi lo ghaona theghewoniye e tine. Va yaŋa, “Thon̄go tembene ya menava mane tembe ya ghatan̄aghatin̄giva.”

³ Ne ya vakatha ngoreiyako kaiwae nuwamiya vaemunjoru mbema emunjoru Krai i utuutu e ghaen̄guke. Ne ya ghaona ko amba hu ghareghare wolaghiyeko. Krai ma i njavovo na i lithi e ghemi, i vurigheghe iya i kaiwo e ghamilughawoghawona.

⁴ Emunjoru ele njavovo tine thi rokros Jisas, ko iyemaen̄ge Loi ele vurigheghe tine mban̄ake e yawayawaliye. Ghime wo yakuwe na wo njavovo, ko iyemaen̄ge Loi le vurigheghe e tine weime amalaghiniye e yawayawalime, na le vurighegheko iyako wo vakaiwoŋa e tinemina.

⁵ Wo hu mandonga thare hu lonjalonga lonweghathi e ghakamwathi. Thare hu ghareghare Jisas Krai i yaku e ghemi, ae? Thongo ma valikaiwae hu thuwe Krai ina e yawalimina tine, ma hu lonweghathi na kaero hu dobu.

⁶ Gharenju i matuwo thongo hu tuthiya lama vakathake ne hu vaidime ghime Krai le rakakaiwo emunjoru ghime.

⁷ Wo nango weya Loi na ne i thalavunga thava hu vakatha thari thanavuniye. Ko iyemaenge ma wo tamwe na wona mbala gharighari thina rakakaiwo thovuya ghime. Othembe gharighari thi thuweime na thina rakakaiwo thovuthovuye ghime, ma wo rerenuwana kaiwae. Lama renuwana moli ghemienge hu vakavakatha thanavu thovuye.

⁸ Kaiwae ma valikaiwame wo vakatha bigi regha na wo thighiyawana emunjoruko, mbema wo vatomweime enge na wo thalavugha emunjoruko.

⁹ Wo wararina thongo ghime wo njavovo na ghemi hu vurigheghe. Na wo nango weya Loi na i thalavunga na yawalimina ghalongalonga i thovuye moli.

¹⁰ Ya mebwagabwaga moli e ghemi na ya roriya letake iyake e ghemi, mbala mbanja ya ghaona, thava ne ya vaidingiya thari gharavakatha na weiye lo vurigheghe ya lithi wengi. Giya i giya lo vurigheghe na ya njimbukikiya le kaiwo, na nuwaiya vurighegheko iyako ya vakaiwona lemi lonweghathi ghavatavatad kaiwae, ma ghamithivathari kaiwae ngoreiye.

Dage mwaewo

¹¹ Lo bodaboda, lo renuwanja ghaghad na mbanjake yaja, “Eeu amba ghinda!” Hu vurigheghe na mbala yawalimina ghalongalonga i thovuye moli Loi e marae. Lo utu e letake iyake tine hu vandene vakatha. Wo lemi renuwanja regha na hu yaku na thovuye, na gharethovu na vanevane gha Loi i yaku e ghemi mbanjake wolaghiye.

¹² Hu ligiya nimami wenjiya ghamune na hu vemwaewo e ghemi, kaiwae ghemi Loi le gharighari.

¹³ Ralonwelonweghathike wolaghiye e valivanjake iyake thi mwaewo e ghemi.

¹⁴ Giya Jisas Krais ghare wenga, Loi le gharethovu, na Nyao Boboma le vighathi thovuye i yaku taulaghina ghemi wenga.

Toto Thovuye Loi Ghalinae
Portions of the Holy Bible in the Sudest language of
Papua New Guinea
Buk Baibel long tok ples Sudest long Niugini

copyright © 2014 Wycliffe Bible Translators, Inc.

Language: Sudest

Dialect: Tagula

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-23

PDF generated using Haiola and XeLaTeX on 18 Apr 2025 from source files dated 31 Aug 2023

7a63d67b-b890-5db0-8880-b6fd64f3b62f